

四庫全書

經部

欽定四庫全書

周易辨畫卷二十四

潁川連斗山撰

萃



坤下
兌上

萃亨王假有廟利見大人亨利貞用大牲吉利有攸往

萃在李切

假庚白切

此卦下坤上兌三陰羣聚于下九五一陽得位于上

有土有民

坤為上
又為民

嘉美畢會所以名萃萃則未有不

亨者也。顧天下既萃，為上者將何以萃之？夫人之所望于上者，誠也。而上之所以致其誠者，祭也。九五居尊，有王之象。重艮為門，有廟之象。王者果自致其精誠，以昭格于祖考，天下亦各致其精誠，以服事其先王。是王假有廟，即王之所以為萃也。然上有以萃乎下，下豈可无以萃乎上？卦中六二、九五之正應也。九五陽剛中正，為德位兼隆之大人。六二柔順中正，自當以本體之離明往見之。

下卦本離，離為目，有見之象。

庶乎君臣

會合而亨上下各貞而利焉然所謂萃者不徒已與
君之相萃已也三陰為牛有大牲之象必合上下衆
陰以共萃于五如祭之用大牲然後得以人事君之
道而吉而為衆陰者亦宜各致其來享來王之誠羣
焉皆往于五然後得所萃之正而利也

用大牲是喻
言下卦三陰

為大牲所謂用者即六二之引也利往
指初三二爻言觀二爻皆言往可知

彖曰萃聚也順以說剛中而應故聚也王假有廟致孝
享也利見大人亨聚以正也用大牲吉利有攸往順天

命也觀其所聚而天地萬物之情可見矣

說音悅

萃聚也言陰聚于下也人情不順則不聚不說則不聚二卦之德既順而又說所以聚也人情必兩相合而後聚九五剛中而下交六二柔中而上應亦所以聚也王假有廟是王者自致其孝享之誠也利見大人亨言二五相聚以正也唯相聚以正所以得明良嘉會而亨也用大牲吉利有攸往者二既應五又率二陰以萃于五皆天命之當然而為二陰者各因其

當萃而往萃之皆所以順天之命也

坤為順五為觀
天翼為命

卦爻之所聚凡天高地下萬物散殊

五為天二為地
坤又為萬物

其為施為受此感彼應之情无往而不見其聚也聚
詎不重哉

象曰澤上於地萃君子以除戎器戒不虞

上時
掌切

地本平也而澤上之上則澤注于地而水聚焉然不
修其堤防能保澤之不潰而常聚乎君子觀象知人
之聚者必有爭爭則患生于不測而物之萃者亦易

散于是修其戎器聚之武庫以備夫內而寇賊奸宄之忽生外而蠻夷猾夏之乍起若是者所以保其萃而使之不散亦猶澤之固其堤防而使之不潰也

兌金

有戎器之象坎險有不虞之象

初六有孚不終乃亂乃萃若號一握句為笑勿恤句往

无咎

號戶報切握鳥學切

此卦與比卦相似比以坎五居尊為有孚此以坎五居尊亦為有孚但比止一陽而五陰應之此有二陽

而四陰應之是有九四以分其應也故比曰有孚盈缶而此曰有孚不終不終者言五本有孚可以見信于天下以九四間之而其見信于天下者不終也

坎為

孚謂五四變坎故不終

夫人之所以相聚者以信耳今初既信

五又信四是二三其信亦二三其萃矣非四亂其所

萃而何

上乃語辭下乃汝也一則專二則亂四五兩陽故曰亂

此无他在上之

號令五握之四亦握之不出于一故也初若知四之

相萃之非正而柔與剛相易則巽號所出俾五得以

一手握之

三五互巽為命有號之象卦互長艮為手有握之象

將四之附五居

坎而以亂萃為憂者今且降下為震而轉憂為笑矣

可勿恤矣

震為笑言故曰笑坎為加憂故曰恤四下居初變坎成震故曰為笑勿恤如是

則五之孚可以終四之恤可以解而初之萃亦可以

不亂而皆由于初四之一往然則初亦惟往易乎四

耳何咎哉

向以有孚謂初初无孚象不必言矣又以號為號咷之號意欲與笑字相對也抑思

號從口出初安得有號象又安得有笑象乎至以一握為一團為笑謂二三笑初六直无理解矣

象曰乃亂乃萃其志亂也

初六本萃于五有四以與之應而初之萃始亂初之亂非初自亂四亂之也志屬四四互長坎有志之象

五之萃下以孚四之萃下以志公私之分耳此正見初當易四以明利有攸往之意

六二引吉无咎孚乃利用禴

禴羊畧切

六二柔順中正上應九五之剛健中正當萃之時其為利見大人也不待言矣然不徒一人見之遂可盡萃之責也下卦初三二陰皆宜萃于五者也以上有九四之間故初則亂三則嗟皆當萃而不得以萃耳

夫當萃而不得萃固五之不吉亦二之咎也為六二

計當整躬率物以互艮之手互巽之繩引之以萃于

五

引字王氏獨以為待君之引已蘇氏濬以為引君以當道一得大臣持身之體一合五爻匪孚之義

各有所見但此以一人比天下萃以天則五得衆人下萃一人則引仍當以二引初三為是

之歸心而吉二亦无朋比不忠之咎矣夫五萃主也

天下之所托命也于下之二陰必待二之引之者何

哉蓋上惟精一乃心至誠孚于天下斯天下自各致

其精一以默與契合如夏祭之禴以聲交神用之而

乃利

引吉无咎乃揔明利見大人用火牲吉之義乎乃用禴又申明所以必用大牲之故當于乃字

言外會之

今五為萃主而四從而分其萃以致五有孚而

不終是上之孚于下與下之孚乎上猶有未至也此

二之于初三所以必相引如祭之用大牲而不能遽

如祭之用禴也歟

孚指五與五爻匪孚相反用禴指二與卦辭用大牲相反初四易位

五坎為孚卦五長離為夏故孚乃用禴今四尚未易故五為匪孚未可用禴也

象曰引吉无咎中未變也

下卦三位本具離體今變為坤是初三兩爻皆變獨

六二一爻以柔居柔守中不變唯其不變所以與五相應而又能引其變者亦萃于五也

六三萃如嗟如无攸利往无咎小吝

卦唯二陽皆陰所欲萃者但萃五正也萃四不正也二與五相應為得其正矣初與四相應雖不得正猶可因應以求其正也皆得所萃者也獨六三與上六不相應欲求萃于五而為四所隔欲求萃于四而四又非當萃之主故處二陰之上而萃如復當兌口向

下而嗟如蓋萃四萃五皆无所利也然時在當萃安
盡得正應而萃之唯視乎在己之自擇耳若能知五
為萃之主而往易于四以從之則亦无妄萃之咎矣
然四應在初往亦何益陰小處此亦殊可吝也是惟
變柔為剛乃為利耳

象曰往无咎上巽也

往五何以无咎以三五互之成巽三為下則五為上
上為申命之主

即若號
一推意

所以往无咎也

九四大吉无咎

易例陽乃稱大九四雖陽爻而以陽居陰猶未為大必如九五之陽居陽位乃可以言大蓋九五陽剛居尊以當天下之萃本自吉也九四以剛處柔而逼近于下初應之三比之凡五之所萃者幾幾乎盡萃于四矣无其位而得其萃能无咎乎為九四計惟有下居于初以卑自處俾天下之求萃者皆萃于五而已不敢干則一人撫萬邦四海仰一人大者吉而已乃

无越分之咎也

象曰大吉无咎位不當也

當得浪切

此借爻位之不當以明處萃之不當也觀五曰萃有位則四之萃无位可知无位而當天下之萃非使大者獲吉已安能无咎哉

九五萃有位无咎匪孚元永貞悔亡

此爻與比卦相似比是我去比人萃是人來萃我然人之所以萃我必因我有其德又有其位然後可以

當天下之萃而无咎九五以陽剛居尊位有其位矣
有其位而當人之萃夫何咎然萃之所以為萃者必
四海之廣兆民之衆莫敢不來享莫敢不來王我之
萃天下乃暢然而無憾今九五雖尊居于上而九四
又逼處于下三陰之衆其萃于五者止六二一爻而
初三二陰反萃于九四是其于上下臣民之際猶有
近疑遠間之嫌而心之孚者匪孚也

此孚字諸說俱謂人之不孚非

也易中言孚自中孚卦而外皆以坎之中畫言或以剛居中畫言此卦九五原有坎象故言孚以九四逼

處于下塞其坎之下畫故言匪孚初之有孚不終者
此匪孚二之孚乃用禴者亦因其匪孚也唯其匪
孚故象傳曰未光言其為九四所掩不能如比五之
其孚乃光所以下文接言元永貞悔亡欲其以比五
自勉也夫以萃主而不能精白乃心以光顯于天下後

必有悔惟反躬自治益修其元善之德而永久弗替
貞固不移則臣之懼者可使化民之貳者可使服天
下之大自近悅遠來而咸萃于我匪孚之悔不期亡
而皆亡矣

象曰萃有位志未光也

天下之大寶曰位位者所以聚人者也九五當天下之萃已有其位矣而象曰志未光者非不足于其位也謂九五居尊而下有九四以間之掩其坎志之光明也屯之五曰施未光因下有初九此曰志未光因下有九四若比之九五則直曰顯比光不足言矣

上六齋咨涕洟无咎

齋將池切
洟音夷

此爻下與三應故謂三言以終一卦之義當萃之時三陰皆求萃于陽初萃四二萃五雖萃有當否而皆

有所萃獨六三處二陽之下而一无所萃若晏然自
處則為咎大矣唯變柔為剛以憂懼為心時形諸嗟
嘆以災危為慮常至于悲泣如以變艮之手齋持兌
之咨與坎之涕洟然齋持也三變艮為手齋之象咨
嘆聲上兌為口咨之象涕自鼻
出三變艮為鼻洟自目出三變四下
成離為目三在坎中為水涕洟之象則敬慎之至必
无過差雖不得萃亦可以无咎矣况積誠之下終无
有不萃者乎

象曰齋咨涕洟未安上也

二應五初易四皆得正位獨六三一爻上无正應又以柔居剛而不能變惟有齎咨涕洟以從其正耳所以然者以居初二之上而不安故也

升

巽下坤上

升元亨用見大人勿恤南征吉

此卦下巽為股互震為足上坤為階以巽股震足動于坤階之上故名升夫升者自下而上士君子有為之會也卦中九二剛而居中有元善之德當此升時

其可以升而得亨不待言矣然非二自能為升也下

之能升每恃乎在上之能舉今觀六五柔中居尊與

二相應為能用順應之道下見于大人

下卦本離離為目故曰見

與之共天位而治天職則獨居而恤其治之不進者

今明良會合可以勿恤其猷之不升矣

六居五位原屬坎體為加

憂今下降居二為雖然下交者人君之盛禮上應者

艮止故曰勿恤

人臣之大義為九二者又必向南而進以應六五之

求

大圖自巽至坤必歷乎離離為南互震為征

乃不負生平之學而吉也

象曰柔以時升巽而順剛中而應是以大亨用見大人
勿恤有慶也南征吉志行也

卦名升者此卦下巽上坤柔反在乎上剛反在于下
非所宜也卦中由巽而坤自夏而秋陰氣正長之時
柔知剛之當升因以時升乎剛故曰升也夫柔何以
能升乎剛哉此卦二有巽入之德而五以坤德順之
二有剛中之才而五以虛中應之有順又有應大者
得以亨此一升也用見大人勿恤者六五以柔居尊

位萬幾之待理不能不恤也下有九二之大人用而

見之以加諸上位明良相會可以成既濟之功而有

慶

六爻得位

此又一升也南征吉者九二抱剛中之德得

君以行道其素志也今自巽而坤由南征以遇好賢

之主其志得以行此亦一升也

坎中為志
互震為行

而非有在

上之柔不至此故曰柔以時升也

象曰地中生木升君子以順德積小以高大

上卦坤為地下卦巽為木互震亦為木木性上達有

地中生木之象故為升君子觀象知木之升以土養
之人之德以順成之于是以坤順之德主敬以直其
內守義以方其外由知能之小積之以至于无不知
能而高大猶木生地中自萌蘖之小積之以至于干
霄蔽日而高大焉此君子之體升也

順德坤之象
高大巽之象

初六允升大吉

此爻允字有以為初信二者有以為二信初者又有
以為三陰信初者傳中合志亦然不知此卦以二五

兩爻為主除兩爻各言本意外初爻乃言二之得升
于五四爻乃言五之用升于二三上兩爻又另為一
義各具本文中細觀之自得 初六陰柔不正巽體
不果上又无應何可言升其能升者二與三也而二
尤以剛中而得柔中之應故于初言二之所以升然
二之升非二之自升由二之德有以信于五五故從
而升之也允信也五本坎
體有信之象夫懷德抱道之士有求君
見知之一日而不得者矣茲何幸尊德樂道之君知

之真而信之切如此哉大者之吉可知矣

允即孚大謂陽指九

二即元

亨也

象曰允升大吉上合志也

上謂五坎為志二得坎之中畫故亦云志言二之允升大吉由在上之五與之合志志合故相信而得升

也

諸說皆以志屬初不知易中于初言志者皆指他爻

九二孚乃利用禴无咎

此辭雖與萃二相同而義則大異萃二之孚孚在五

者也六二以柔中應之未易得其孚也故必引吉无咎待其孚乃可用禴升二之孚孚在已者也誠至而物自應故不尚文飾必用禴始无咎即南征吉也九二以剛居柔其位不正而上有六五之應如人臣之進結于君唯患其不知若果知而應之尚何須用其文飾唯有竭盡忠誠如夏祭者之用禴雖薄物亦可

以交神也

二之五成坎故曰孚禴夏祭屬離二之五互離巽之坤經離皆屬南用禴正發明南

義 征之

如此復何至于有咎不然若外假文飾以博虛

名則不能免咎矣

初爻已指出九二之升由下在上之允故此爻直言在下之孚以見

其當往不

復言升矣

象曰九二之孚有喜也

爻辭乃責重其當孚以見南征之意未及吉字也故

象傳以有喜補之言九二之孚非徒盡人臣之心而

已平日之志欲得君以行其道者今果得君而道可

行矣有喜也喜故吉也

二四互兌有喜之象

九三升虛邑

虛邑向解為无人之境竊思四為用亨人亨之也五
曰升階人升之也豈是无人之境豈得為虛所謂虛
者其上六冥漠之太虛乎蓋三與上為正應五為天
位上又在天之上非太虛而何所謂邑者乃本坤取
象猶云太虛之地云爾非无人之都邑也且天下安
得有无人之都邑哉 九三以剛居剛有能升之資
上應上六又有可升之地則積其功力以達于冲虛
之境充其志氣以通于太虛之鄉其德日以崇其達

日以上不有如人之升其虛邑乎大象傳所謂順德

積小以高大者其象正如此

二三四五皆能升二得中應五乃一卦之主故

合初四兩爻俱以事功言以發明卦辭之義三得正而應上未可以附于二五故另以學業言以發明升字之義即大象傳以順德積小以高大之旨也

象曰升虛邑无所疑也

此與上六皆以聖學言升之義與諸爻不同凡人于進修之事其剛柔之不正者則處之不能无所疑九三以剛居剛在此者既一无所偏上六以柔居柔在

彼者又一无所偏无所偏則无所疑所以自下而升如履道之坦坦也

六四王用亨于岐山吉无咎

亨如字

六四柔順得正當升之時知五之虛中以待升者二也于是內守忠貞外絕私應以安處于臣位而不敢升此真得純臣之道以事其上者六五即用其誠意

以達于几二猶祭者用其誠意以通于岐山

岐山西山也二

四互兌為西二上之五下卦成艮為山四切近于五而柔順得正故用之以亨于岐山用字與九三用禴

用字 雖神明亦可格焉此即卦所謂用見大人者蓋
對 用此順應之道以通于九二也如是則有得人圖治
之吉而无簡賢慢士之咎矣

象曰王用亨于岐山順事也

六四以柔居柔又在坤下順之極也爻言王用亨于
岐山蓋用其順道以事岐山之神也夫順可以事神
況人有不可事者乎五之用見大人用以此耳

六五貞吉升階

此文正發明元亨之義四爻已言五之順應于二此
爻則直言二之得升于五也六五以柔居剛九二以
剛居柔皆中而不正位既不正何由君臣相與以共
成治功必五與二各得其正然後正朝廷以正百官
正百官以正萬民而吉也夫五與二何由而正哉五
在上之君也二在下之臣也使上下各自為守而不
相交將君有盛位誰與佐其下風臣有幼學何由登
諸上治唯五不惜屈已下賢俾二得登庸以行其道

如歷階然拾級而升

坤上三疊象階震足能動象升

則君臣相得水

火既濟二五各得其貞而吉矣先儒以升階為踐阼

正是此意

象曰貞吉升階大得志也

大謂九二得志謂二上居五彖傳之志行象傳之合志皆此一志字貞吉升階是二升于五而得正如舜之玄德升聞乃命以位時其平成之志大得也

上六冥升利于不息之貞

此文與九三相應另即下學上達以發升義冥乃冥
漠之冥即九三之所謂虛也上六居天位之上為冥
漠之界九三以剛正而升于此故其象為冥升夫冥
而曰升莫知其冥于何際升而曰冥更莫知其升于
何窮中庸所謂上天之載无聲无臭者其謂斯乎夫
下學可以人為上達非由力致學至于此其升已極
但以九居三其位雖正其功易息唯朝乾夕惕時葆
其不息之貞如天行之健乃為利也

象曰冥升在上消不富也

冥升而又利于不息之貞者以冥升在上已入窮極之地天下之理盛極必衰益極必損升極亦必消消則陽復降陰富者轉為不富矣唯利于不息之貞庶可以長守其富耳

陽為富陰為不富

周易辨畫卷二十四

欽定四庫全書

經部

周易辨畫卷二十五

詳校官給事中臣丁雲錦

通政使司副使臣莫瞻菴覆勘

總校官無吉士臣倉聖脉

校對官中書臣牛稔文

謄錄監生臣沈世琰

欽定四庫全書

周易辨畫卷二十五

潁川連斗山撰

困



兌上
坎下

困亨句貞大人句吉无咎有言不信

此卦上兌下坎二水本自相通以兌澤之水瀦而不
流斯坎中之水不得不闕而下潤是坎為兌所塞猶
人之處境為人所制也故名為困困與通相反而占

曰亨何也人有身困而道亨者樂天知命素貧賤行
乎貧賤是也人有從困而得亨者動心忍性增益其
所不能是也卦中九二本坎之有孚心亨者故曰亨
然九二在下位者也必有在上之大人從而拯其困
然後可以亨卦中九五即陽剛得正之大人雖當困
時未能遽然相應而同德相與終能濟其困而得吉
而二亦無援上之咎但此特論其後耳若當現困之
時而遽謂二曰吉无咎吾知二惟以義命自安必不

信也豈浮言所能動哉

兌為口言之象指上坎為耳信之象指二字字與爻辭相

對照末句乃反折語耳尚以有言屬君子不信屬衆人但察爻傳俱无此義

彖曰困剛揜也險以說困而不失其所

亨

其惟君

子乎貞大人吉以剛中也有言不信尚口乃窮也

說音悅

剛揜諸家皆以上卦之柔揜下卦之剛及以柔畫揜

剛畫夫柔果可以揜剛夫子何不如柔變剛之例直

曰柔揜剛而乃曰剛揜乎竊意剛揜者指九四之揜

九二也

此卦與井卦相反井以坎水上出取象此以坎水不行取象故井以九五為主困以九二

為主蓋四爻非九原屬坎卦兩水相接其行有尚未嘗

揜也今以九居之變流水為止水坎中之水不能以
上行此所以為剛揜此所以為困也其曰亨者卦德
坎險而兌說猶人身在險中而能和說也夫身在險
中似已失其安之所而今猶然險以說是身雖困而
其所仍然未失也故曰亨也非有孚之君子其孰能
若此

君子以下位者言故謂九二

貞大人者卦中二五皆大人而

九五獨得正是貞大人也

大人以上位者言故謂九五

吉者九五

剛而得中九二亦剛而得中

剛中宜無屬二五剛則不然則曰中正矣

有處困之德中則有出困之才才德皆同相賴以濟此九二之所以得吉也有言不信者上兌為口二坎為耳今上與二遠乃處于窮極不相應之地此所以雖告以吉无咎之言而坎耳如充不信也蓋其有孚心亨者素矣

象曰澤无水困君子以致命遂志

兌為澤坎為水澤中有水也何以曰澤无水先儒謂

坎水下潤澤瀦不流上不見增下日見損所以无水耳雖然天下安得皆无水之澤哉此卦上澤下水中

間以離離為火為乾卦

乾音下

又為中虛此其所以无

水也夫水性喜通今不為通而為塞猶人之阻于時

而危于勢所以為困君子觀象知人世之吉凶禍福

皆命也

巽為命

吾身之取義成仁有志也

坎為志

人惟惑

于吉凶禍福之命是以喪其取義成仁之志而為其所困耳吾惟舉吉凶禍福之不可知者委而致之悉

聽于在天而于取義成仁之所當盡者直而遂之務

伸其在已夫是以涉坎險而不辭

下卦坎三上又互長坎

受巽

命而能悅

三五互巽為命兌為悅

身雖困而心則亨焉此君子

處困之道也

初六臀困于株木入于幽谷三歲不覿

臀徒敦切覿大歷切

初六以柔居剛上應九四宜取相易之義以卦屬處

困九四又為剛揜之主故不于初爻取相易之義若

于初爻即取此義則諸爻不困矣其爻中說象于初

俱无所取以初擬卒成之例推之初爻乃言三四上
爻乃言二五也蓋九四乃困人者然人困而已亦未
嘗不困如上卦兌為羊九四居其後則羊之臀也以
臀而坐于堅多心之上

坎為堅多
心之木

是株木也夫株木

豈可坐者是困人而適以自困也若六三則與四切
比正受困者也然因其困而以互巽之入下居于二

則艮山之半正當幽谷之中其困益甚

三下居二變
坎為艮山之

半處故
曰幽谷

且不但一時之困而已雖自三至五時歷三

歲而離目不見亦无所覲其困為何如者然則為四
與三者可不知所變計耶

象曰入于幽谷幽不明也

三在互離之中本明也今入于幽谷而離變為艮則
幽而不明矣其三歲不覲也固宜

九二困于酒食朱紱方來利用亨祀征凶无咎

食音嗣
紱音弗

下同亨
如字

此文正處困而亨者坎水以行為利今為九四所掣

則坎水困矣九二以剛居中雖困而能不失其所有

困于酒食之象

坎為水又為中滿故取象酒食

夫酒食宴樂之具二

困于此其心亨可知然君子志在行道非徒以宴樂

鳴高也況上有九五同德之應方以朱紱之飾行來

拯已

朱紱指九五乾為大赤故象朱紱蔽膝行之飾也五動變震為行故曰紱

二可不用

其中之所亨者積誠相感如祀事之假神明乎

卦中承羊

俱備故曰祀

但時當困阨往與四遇則凶安守于中則无

咎也

象曰困于酒食中有慶也

酒食何以為困以終日醉飽而其道不行也然能確守于中而不失則困極而亨自有君臣之合既濟之慶也

六三困于石據于蒺藜入于其宮不見其妻凶

蒺音疾
藜音黎

下卦皆受困者而六三以陰柔不正與四近比其困為更甚夫兌為剛鹵四不有石象乎坎為叢棘二不有蒺藜之象乎六三上壓于四既困于石而難進下有

乘乎二又據于蒺藜而難安若以互巽之股退入于

艮之宮闕以安處

三互巽為股故曰入居二為艮艮為門闕故曰宮

則互體

之離目失其明上六之少女失其應

兌為少女與三正應

妻亦

不可得而見三者无一而可有陷于死亡而已豈不

凶哉

三下居二互為大過大過棺槨故有死亡之象

象曰據于蒺藜乘剛也入于其宮不見其妻不祥也

下三文皆為四揜而三獨與之切近其困于石也不

待言矣若九二乃其同困者而曰據于蒺藜何也以

九二為剛六三以柔乘之也柔而乘剛豈其所安之地哉又云入于其宮不見其妻者人當進退皆无所入而在家妻子尚可聚處乃并其妻亦不見則孤危之至不祥甚矣言必凶也

九四來徐徐困于金車吝有終

此爻正為困者因其以剛居柔又互巽不果又與初有應故為之戒曰四之揜夫坎者其意蓋欲下來也乃吾觀其來既居柔又互巽何其徐而又徐也得毋

以其徐徐者困于坎之金車

坎為車輪

而使之不行乎夫

二有剛中之德豈四之所能困吾見其徒足以取吝而已然六爻之中惟四初為相應其始雖為困其後必易位而有終豈常困哉

象曰來徐徐志在下也雖不當位有與也

當得浪切

志在下指九二是釋困于金車有與指初六是釋有終言四之來徐徐者以志在下卦之中將欲揜之也所由然者以四位不當故耳然六爻之中獨四與初

應為有與有與則終得其正不常為困也

九五剿剛困于赤紱乃徐有說利用祭祀

剿魚器切剛音月說音悅

九五陽剛中正以居尊位所謂得貞之大人也下有

九二剛中之臣本同德相應以九四之剛為之揜遂

致君臣相聞上下俱困其象如人之通氣者鼻也九

四居五之下是剿五之鼻矣上之氣不通矣人之相

接者足也九四居二之上是剛二之足矣下之體不

接矣

剿剛向以為五之受傷又或以為五之傷上下皆未知卦象也五與三互艮有鼻象二與四互

震有足象今皆以九四之兌金加之兌又
為毀折故象劓則謂二五為四所隔也 如此則下

雖有赤紱之臣亦阻于四而不能進是四非困于赤

紱乎

乾為大赤二居巽股之下故曰赤紱程子以為臣下之服取行來之義是也

夫道同

德合君臣本相說者也乃以困于四而相隔不說孰

甚焉然道同者物不能違德合者邪不能間明良會

合君臣自得相遇而說但當此其來徐徐之時彼之

來徐徐之說亦徐耳惟利于用祭祀之道竭誠以動

之俟其自至而已矣

說兌之象徐字與徐徐對祭祀與二象同 此大人處

困之道也

象曰劓刖志未得也乃徐有說以中直也利用祭祀受福也

五二同德志在于相與劓刖則不能以相與是其志

未得也

五本坎體坎為志下有九四坎體不成故曰志未得

乃徐有說者以二

五有中直之德中則其道同直則其理正故能說也

二本離體離為矢有中直之象

能用祭祀之誠以相感是以明良際

會而天下共受其福也

上六困于葛藟于臲臲曰動悔有悔征吉

藟乃軌切臲五結切臲五

切骨

此文乃統言二五之義所謂卒成之終也葛藟句指二臲臲句指五曰以下即有言句之正面悔征吉即大人吉之實義也 上六居一卦之終困既極矣以二言之二受困者也二之上為互巽巽為木為繩如繩之木葛藟之象也二困于其下既束縛而不得出二五相應二困而五亦困五居巽木之上亦臲臲而

不得寧困至此極極則當變矣當其先預告之以困極當變之道或不信也今猶不可以信乎為告之曰兌為口曰人之自凶而之吉惟視乎能悔尤貴于能之象也

動但二在險中未可以遽脫而五在險外則可以自遂五若能鼓舞奮興一旦而有悔則變剛為柔易兌

成震

震无咎者存乎悔見繫傳

而九二有應矣二得五以為之應

則困有與濟向之征而見凶者今可以征而獲吉

五動

應二二得上行各正其位所以為吉

蓋至是而有不言言无不信矣尚

何困之足云

象曰困于葛藟未當也動悔有悔吉

句行也

當得
浪切

困者坎為四剛所揜而不能行也能行不困矣故全卦皆以行取義初三言入二五言紱四言來上言動皆行象也爻言困于葛藟者以九二居位未當適為九四所隔故如葛藟之糾纏而不得行也動悔有悔吉者以九五動變為震震則能行五下行以應于二二亦得上行以應乎五也夫二至上行以應于五則

剛柔各正夫何至于困哉

井 ䷯

巽下
坎上

井改邑不改井无喪无得往來井井汔至亦未繙井羸

其瓶凶

喪息浪切汔許訖切
繙音橋羸力追切

為卦下巽為木上坎為水木上有水井之象也三陰

為井之體三陽為井之泉故卦辭止就三陽爻言首

三句謂九五第四句謂九三第五句謂九二此卦與

困相似惟三四兩爻上下互易耳卦中上中下三陰

為坤有邑象今三上居四又當上下改革之地是改其邑矣然邑雖改而坎體未變是井未改也惟其未改故下為坎上仍為坎无所喪也乃上之坎猶夫下之坎亦无所得也既无喪又无得是以三往居四上成一井四來居三下成一井一往一來若有二井究之仍然此井也所謂改邑不改井者此也然井亦期于上出耳九五其居最上其為人之所取用也不待言矣九三九二亦井中之水也九三居下之上取水

者亦幾至于其處矣乃以隔于九五用止及于五而

不及于三雖有甘泉亦如人之未緇于井等耳

汜幾也緇

綆也汲水之繩也

若九二則去上愈遠愈為人之所不用如

汲水之瓶已遭羸敗止漏于下終无上出之時焉

敗羸

也瓶汲水之器也巽為繩象繡兌為毀象羸離中虛象瓶

夫蓄水以養人猶懷才

以濟世也乃才既裕矣而世終不用是天下之飢渴

皆我遺之也豈不凶乎

全卦俱照三陽爻言非上三句言井下二句言汲井也亦

未緇井言繡不及乎三羸其瓶言二終不出于上凶止就不能濟物說物之不濟亦在其內非失其具之

謂也

彖曰巽乎水而上水井井養而不窮也改邑不改井乃以剛中也汔至亦未繙井未有功也羸其瓶是以凶也

上時

掌切

卦名井者此卦下巽為木為入上坎為水以木入于水下而上出其水猶俗云引瓶入水而汲取其水也故名井卦中九五居坎體之中在一卦之上是井也是能養者也日日取之而不匱人人取之而不竭蓋

養而不窮也夫一井耳而奚以能然哉卦有曰改邑
不改井任三四之往來以改其邑而上下之坎體如
故其井卒不改蓋惟其剛而能中剛則裕乎養之體
中則周乎養之用其養而不窮者乃以此也若三則
隔乎五矣汲水者雖幾至于三而既得乎五勢必不
更及乎三是與未繙于井者无以異夫井以濟物為
功繙不及已是未有濟物之功也至二則愈遠于五
不但无濟物之功而已猶汲水之瓶已敗其水終无

上出之日也卦所以曰凶也

巽乎水句釋水之名義已畢養而不窮句正贊

九五之德下剛中句正與此句相應乃以者言以此剛中所以不窮也改邑不改井乃借剛中之象作引耳三句是倒裝文法與下四句一例觀傳中不及无喪二句可知彖辭言三陽文之體傳辭推三陽文之用卦言井止宜言井或乃牽入治道性體俱屬添設

象曰木上有水井君子以勞民勸相

勞力報切相息亮切

木上有水朱子以水達木末取義非井象也程子以木承水上取義是汲井亦非井象也然則木上有水何以象井凡為井者樁木入土中橫版作井底水自

穴出溢于板上此木上有水所以象井也君子觀井之養人而知井田之尤能養人也于是法巽之申命以勞其民使之力作而不倦法坎之有孚以勸其民使之相助而不私則稼穡有獲而賦稅有出上下皆得其養亦如井之養而不窮矣

初六井泥不食舊井无禽

泥乃計切

此卦以三陰為井三陽為泉而初六則井之底也二為水初為土水下之土非泥而何初六居此故有井

泥之象夫井所以供食也井而為泥誰其食之宜二
四互兌之口仰而向上而不食之也然初之在困原
屬坎體儼然一井耳自三進居四則上為新井而下
為舊井矣井既為舊勿論人不之用也彼離象之雉
非其正應乎乃以其陰柔也亦但翔于上而不集于
下其終淪于泥汙可知已

井泥于初取象无
禽以无應取象

象曰井泥不食下也舊井无禽時舍也

舍音捨

井泥不食者以其陰柔居初德不足以潤物也下也

舊井无禽者以其處下无應道不足以匡時也時舍也

九二井谷射鮒甕敝漏

射食亦切鮒音付甕屋送切

此爻即象中羸其瓶之義井之製下大而上小九二居井底之上正當空濶之處二實初虛又當兩開之處故象井中之谷

山之凹處為谷二下有陰谷之象也

夫二雖在谷之

中而已超于泥之上是有泉者也使其溺然仰出則其濟人利物寧有既耶乃以上无應與僅下比于初

六之陰不為上而為下雖有清泉不過注射于井底

之鮒而已矣

下卦本體為離離為矢今變為長坎坎為弓弓與矢合射之象也鮒小魚也初

六之象始之包有魚是也

然使其器猶可以待時而有濟无如

上有中虛之離而適際毀折之兌如甕之敝而下漏

焉

三五互離為甕二四互兌為敝澤底下開故漏也

尚望其引之而上耶士

君子抱養人之才德而遭時不偶僅堪以小試于下

也何以異此然小試于下已二初易位各得其正矣

象曰井谷射鮒无與也

井谷虛而有泉以鮒之涸于泥中猶射而及之而不
遺于小若得其所與則浥彼注茲豈止于射鮒而已
哉乃下本坎也自三進于四第與于五而不與于二
此所由僅見于射鮒之小注而无當于見龍之普施
也

九三井渫不食為我心恻可用汲王明並受其福

渫息列切

此爻即汔至亦未繙井義九三陽剛得正居井谷之
上无井泥之汚是泉之澄治清潔者也其象為井渫

但井道貴上三猶在上體之下汲之者至五而止是水雖潔而中虛之離瓶不至也不至人何由而食之

三在兌口之下故象不食

夫井漂本人所宜食之物固四之所素

睹者乃以已之上行而遂不為人所利用有不以為是

我心之所惻然乎

我謂四卦主也坎為加憂四居坎體故曰心惻

吾推惻然

之心若曰是泉也可用緇以汲也惜不遇王之明者

耳使有王之明者用緇以汲之則其泉上出養而不

窮君民並其福矣

五為王互離為明四兌口承五故呼而告之

惜乎其不

遇何哉

井渫不食一句汙至亦未繙井之義已完下皆設為六四代惜之辭

象曰井渫不食行惻也求王明受福也

井渫不食而又曰為我心惻夫井泉在已食不食在人三何惻之有所謂惻者乃上行之四代為惻也

此卦

自困而求三往居四又當人位故曰行人

惻其有可汲之資而繙之不至

也求王明者豈三之求之哉以賢人者斯世君民之所賴猶井泉為天下飲食之所需為之求之將以共受其福也

六四井甃无咎

甃則
候切

三陰皆井體四居其中井之身也以當兌缺之處則
井圯而泉污矣六四柔順得正自困三而往與三五
易有時三往于四者亦有時四來于三故三為泉象
潔四為體象甃乾卦亦以三四兩爻為進修之地甃之則井潔而泉
甘雖无及物之功而亦可以无咎也

象曰井甃无咎修井也

此卦以三四往來成卦三自外而內故曰潔四自內

而外故曰修修者往來除治之象也井若不修則无以凝九五之泉五泉之冽四修之力也故无咎

九五井冽寒泉食

冽音列

此即彖之所謂改邑不改井井養而不窮者也九五

陽剛中正以居尊位剛則其水清中則其味甘

五為上故

甘位在北方則其性寒是井之清甘而冽寒冷之泉

也具如此之美而又當井口之下兌口之上是人之所共食者也夫井之為井以濟用也今九五以如是

之泉而又為人所食井之道无遺憾矣不言吉者上六之元吉即九五之元吉也

象曰寒泉之食中正也

此爻只言九五之泉足以為人所食尚未說到人之取食上至上爻終五之義始言之故爻不著其占而傳祇推其德蓋惟其所存者不偏不倚所行者无過不及所以為治道之至善濟世之深仁如泉之寒而為人所食也

上六井收勿幕有孚元吉

收詩救切
幕莫狄切

三陰象井初為底四為身而上則井之口也井口而
曰收者非緇至此而收亦非功至此而收也蓋井之
為製下寬而上狹故二曰谷而上曰收言井體至此
而收即井口也幕井蓋也不汲則掩之今以陰居上
兩開而不掩故云勿幕也井收勿幕則任人取之不
禁矣夫上非有水也上之求皆五之冽寒之泉也惟
五有冽寒之泉淵淵而莫測源源而不匱為習坎之

有孚

坎為孚

故可以養天下之欲給天下之求而无有

竭時也井道至此豈不至善而元有功而吉乎

井收勿蒙

上六之象有孚元吉謂五即改邑不改井三句之義也

象曰元吉在上大成也

元吉者五之元吉也乃不係于五而係于上者蓋五雖有冽寒之泉非有上六之勿幕五之泉亦窮于无所施何可遽許以元吉惟至于上五固施于人而不靳人亦取于五而不窮大者之功乃成也此元吉所

以在上也

大謂陽指五非三
小成上大成之說

周易辨畫卷二十五

欽定四庫全書

周易辨畫卷二十六

潁川連斗山撰

革



離下
兌上

革已日乃孚元亨利貞悔亡

已音紀

一部周易六十四卦三百八十四爻其中言言凶
言悔吝言无咎千言萬語總欲使人各歸于正而一
卦六爻爻得正者惟既濟一卦自既濟而外六十

三卦皆不能各得其正此交易變易移易之所由起而往來變化之所由行也此卦上兌下離六爻之中惟九四一爻不得其正不正則不能无待于改此所以名之曰革顧六十三卦卦卦有變此獨曰革者何也此卦下為離火上為兌金六爻位象風爐此卦與鼎反對象見鼎以金入爐炎以離火鼓以巽風金從而革又四界上下之交改易之際故此卦獨名曰革乾之九四夫子傳之曰乾道乃革亦此謂也此一革非若他

卦一人一事之小變也卦中二四互巽為命四爻一變六爻皆正此王者更姓改物之大變也故六爻自初至終止以改命一事言初則致其慎重二則言其定策三則言其決計四乃正言革命五乃方革而制作一新上乃既革而臣民丕變此傳所以嘆革之時為大也夫革固有其時矣而卦曰巳日乃孚何也前謂變更之事人心未能遽信必巳革之日而後信據卦辭釋之非不通順然合二卦解之殊苦乖違後人因此訓以戊巳之巳其說始于朱漢上繼于張慎甫而來氏更暢其義理致甚精然謂以火克金而必間

以相生之土是已乃所以生之而非
所以革之矣細思卦義恐不謂然

蓋革也者去故

而更新也更新也者即十干庚辛之義也而庚辛必
先之以戊已非戊已則不能遽及于庚辛也然戊已
均耳不言戊而獨言已者何故蓋十干戊已居中而
已又在中之後猶六爻三四居中而四又在中之後
其言已者蓋以配四也此所以不言戊也至已而言
日者革以時取義十干本以紀時而四變又互離為
日此所以云已日也其言乃孚者坎為孚二上互為

長坎有孚之象言革命之事至重極大其初人未信
至已日四變而人始信之也況已土又主信革之有
賴于已者正多乎獨是三五互乾已日正在其中體
乾首出非具乾德之全者動則有悔必素有長人之
德而元行元不通而亨而且所革者又皆合乎天理
人情之至正而利貞然後能舉易姓受命之事而悔
可亡也不然可輕言革哉

爻曰革水火相息二女同居其志不相得曰革已日乃

乎革而信之文明以說大亨以正革而當其悔乃亡天
地革而四時成湯武革命順乎天而應乎人革之時大
矣哉

說音悅當
得浪切

卦之名革卦中原有其義以物理言之上兌水象也
下離火象也水之潤下者可滅火火之炎上者亦涸
水是相息也相息則革矣更以人情言之兌少女也
離中女也兌以少而越乎上離以中而處乎下是志
不相得也不相得則亦革矣凡此皆可以名革而象

意之革不然曰已日乃孚蓋言一卦五爻皆正獨九
四一爻不正又當上下變更之際為九四者當革而
使正也然而非常之原黎民懼焉至已日當革之時
革之而人始信之也雖然日也者可革之遭也德也
者能革之具也時苟當革而德不足以革之能免不
當之悔乎今觀卦德內文明而外和說明則達事理
而革不苟說則順人情而革不拂以此用之于革吾
知其合乾道之流形而革為大亨應乾道之保合而

革以各正其革也乃革之而至當者也人之革必如此之當其悔乃亡也更即卦爻推之上屬天本陽也今變為陰初屬地本陰也今變為陽是天地革也就中思之巽為木非春乎離為火非夏乎兌為金坎為水非秋與冬乎而四時不既成乎商以金德王彼兌之金即湯也周以火德王彼離之火即武也九四一變而巽體改是湯武革命也巽為命而亦非強也五為天四亦不過順乎天三為人四亦不過應乎人而

已究之天地聖人之革皆時也時未可革天地聖人不能先時既當革天地聖人不能後革之時其大又如此豈但庚之必先以巳日哉

象曰澤中有火革君子以治厯明時

象傳雖有水火相息之說其實卦以革名祇重火能

乾

音干

水上蓋澤本能克火今火在澤中是火反能勝

澤也所以為革君子觀革之象知革之最大者莫如時而時非厯則不明于是舉日月運行之次星辰推

遷之度候氣時歲之節治為厯以明其時由是春夏
秋冬之變分至啟閉之候晦朔弦望之期莫不昭然
于敬授推步之餘而時无不明此君子法革之大者
也大抵離兌夏秋之交乾道乃革之際正君子所不
敢忽而五德迭運當王者貴易朔改步又革命者之
所首重也

初九鞏用黃牛之革

鞏九
勇切

革者更變之義離為戈兵以戈兵為更變則撥亂反

治之舉也初九陽剛得正有能革之才但當方革之始人心未屬豈可輕發上有六二柔順中正近與之比惟當以无過不及和順從容之道以自固守而不

敢輕革其象如輦用黃牛之革然

離為牝牛中為黃色革則去毛之皮

未變者也初方入離四月之時鳥獸之毛方脫書曰鳥獸希革是也

蓋黃牛之革未變

初九當鞏固用此无文之質不可遽變也不可遽變非終不變正欲慎重以善其變也此與遯二用黃牛之革不同彼以革為約束之具此以革為未改之質

對虎豹之變而言也

象曰輦用黃牛不可以有為也

有為者即以離之戈兵行革命之事也初九位下不
中居剛又不順不中不順革命之事豈可輕嘗爻謂
其輦用黃牛即以其不可有為也蓋黃牛謂六二正
巳日乃革者用黃牛即用其巳日乃革也然則不可
有為特未至巳日耳豈終謂其不可有為哉

六二巳日乃革之征吉无咎

向謂此文已日乃革即彖辭已日乃孚非也所謂已日乃孚者指九四變離為日而言謂至彼乃孚也故三乾爻皆曰有孚此文雖亦為離日尚未至于已位其言已日者乃立乎今日以逆計其後不但不可言孚併不可言革玩乃字語氣是言已日乃可革之革之乃可孚之非果已革也所謂嘉謨廟筮次策而後從事也古人舉大事必先卜此卦離有龜象倘亦有所卜之而然歟不然九五未占之云奚為來也此文

柔順中正上應九五中正則不急于革柔順則不強
于革有應則又勢處于當革故預為之計曰時在當
革誠不可以不革但革不可驟也其必已日乃革之
乎計審而慮周如此夫然後伐暴救民往而征之有
疑命之吉无妄干之咎也

前人有謂卦曰已日乃孚
爻曰已日乃革者信而後

革也此又不然蓋論理自是先孚而後革而合諸爻
觀之孚顧在于革後者正以改命之事未革之先難
以必人之信耳如必人盡信而後革則直曰革之而
已何必又俟之已日哉試觀武之伐殷也遲之又久
而後舉事而既舉之後猶必反覆丁寧以相告戒蓋
深恐人之未信也湯之伐夏雖東征西怨南征北怨

若无不信者而究之天下之信亦在仇餉征葛之後
何得言先孚後革也言有近理而悖卦旨者似此之
類不可
不辨

象曰已日革之行有嘉也

革必俟于已日者以革不可驟必至已日然後其行
有嘉也不然革尚未可敢望吉无咎哉行釋征嘉釋
吉无咎

九三征凶貞厲革言三就有孚

九三陽剛得正亦能革者也但以重剛居離火之上

上有澤水若率意前進則有息火之憂其征必凶

征二

吉而三征凶者二以議革而言論其理也理則无不吉矣三以將革而言舉其事也事則宜有凶矣

守正不進則有逼處之勢雖貞亦厲當革之時最為

難處幸位應兌口未發于變革之事者已先備于變

革之言于初言黃牛之革知時之不可以有為未就

也于二言已日乃革知行之必可以有嘉雖就亦仍

然未就也今至于三徑革似不可不革又不能勢不

可以而金革之言就矣

言指初二兩爻之辭三即九三又離亦為三就成就也

夫一議革之言而歷乎初歷乎二又歷乎三凡經三議而後就則其審幾觀理雖未有孚于人先已有孚于已

坎為孚卦互長坎故三陽爻皆言有孚

其于革命之事尚有躊躇

而不決者哉

象曰革言三就又何之矣

改革之事固不可輕舉亦不可狐疑若改革之言至三是其理已審其計已決失此不往更何往矣舉而革之可也

離象龜可用卜稽疑者三人占則從兩人之言況于三乎所以云三就

九四悔亡有孚改命吉

此文即卦中所謂已日乃孚革而當其悔乃亡也蓋卦中五爻皆正皆不當革革之皆不能无悔何也以其非已日也九四以陽居陰處位不正又當上下改革之際以爻位論在中位之後以十干論亦在中位之後中位屬土正是戊己之已變離為日所謂已日也過此為庚矣以此而革革之所以為當尚何有悔初之輩用者用此二之乃革者革此三之三就者亦

就此今已至于此變而為柔不獨五居坎中有孚于

天心

五為天位

抑且三五坎中併有孚于人意

三為人位

由是

取乾為天巽為命而改之如湯之伐夏武之伐商自

然天與人歸得各正之位成既濟之功吉可知矣

此卦

之主爻不言已而以已日已見于二也卦例多如此向以二為已日似誤

象曰改命之吉信志也

改命何以為吉夫改命乃人心之所疑疑則不能順何以得吉茲之改命乃出于有孚如東面而征西夷

怨南面而征北狄怨天下信其志皆曰非富天下也

是以吉也

坎為志兌為悅故曰信志

九五大人虎變未占有孚

九五陽剛中正自改命之後已踐天子之位矣是為

大人

九為大五人位

夫大人者武功與文德兼備者也其取

天下也雖以武其治天下也必以文猶武王武成以

後制禮作樂舉天下而更新之也其象不有如虎變

乎顧革之九五即乾之九五乃彼曰龍飛而此曰虎

變何也蘭氏廷瑞曰龍如堯舜之揖遜虎如湯武之
征伐是固然矣不知兌為白虎五居其中互巽為風
二當其位惟風從虎卦中原有其象也其曰變者自
初至上由未革而及革又由革而及改由改而及變
淺深之序也初為黃牛之革以去毛之皮而言尚未
變也五上為虎豹之變以有毛之皮而言則已革也
由離夏而至兌秋此卦下
離上兌希革毛毳亦自然之理也
未占有孚者互與二應二離為龜已日之革即占辭

也不占何以知為已日人第知大人之變於占之後
而乃信而不知未占之先其德之足以王天下已有
孚矣如詩咏文王周雖舊邦其命維新是也卦曰已
日乃孚孚此而已

三言有孚者改革之理可信于已
也四言有孚者改革之事可信于

人也五言有孚者改革既舉天
下共信之也此三有孚之分也

象曰大人虎變其文炳也

革以湯武革命言夫子恐人疑其專尚威武故釋之
曰大人虎變非徒以干戈示武也其乘乾嚮離卦制

顯庸文章燦爛如虎革之光華其文炳也

二居離應五四變離

比五離為文
明故曰炳

豈第以武是尚哉

上六君子豹變小人革面征凶居貞吉

此爻與師上相似言革道既終天下被大人之化者其不變有如此為上者惟當共安于无事不必更有

所擾也君子以有位者言小人以无位者言有位者

沐浴于大人之化而禮陶樂淑如豹變之文彩

豹似虎而

文小故以
此君子

无位者悠游于大人之化而去舊從新亦

革面而不知

革面亦不必定作面目凡物之在表者皆謂之面革面者言變其舊染之惡習

也向以為面革而心不革太泥

蓋合天下俱歸于虎變之中矣夫君

子進于文明小人安于質樸此各得之分也若以其質樸更往而變之則人心疑懼反以取凶惟各安其所以貞自居則四海永清而吉矣此即元亨利貞之意

象曰君子豹變其文蔚也小人革面順以從君也

蔚音尉

君子小人皆是大人虎變所致但君子誦詩讀書其

得于虎變者深故其文蔚然慈藹

蔚以草木之茂如
盛言從巽取象

豹之潤澤也小人耕田鑿井其得于虎變者較淺故

惟順從君令

順從有心悅誠
服意從兌取象

改其舊習而已要之皆

革之極也

鼎



巽下
離上

鼎元吉亨

鼎丁
冷切

此卦下巽上離其名為鼎

其象義詳
見下文

乃飲食之器所

以為養者也六十四卦中惟井與鼎以養為義皆以

物名卦所謂以制器尚其象者也但井以巽木入乎
水鼎以巽木入乎火耳此卦除初爻互之為大有其
象略同故其占亦略同卦中九二陽剛得中所謂元
也上有六五柔中之君與之相應有是君有是臣必
能盡養賢之典與之食天祿而元獲吉必能盡引賢
之道與之共天位而元得亨也此卦以九二為主上
九爻辭正謂九二故兩爻占辭皆吉此吉字即謂下
文非衍文也

彖曰鼎象也以木巽火亨飪也聖人亨以享上帝而大亨以養聖賢巽而耳目聰明柔進而上行得中而應乎

剛是以元亨

亨飪亨以俱通烹普庚切上行之上時掌切

卦名鼎者取象也巽為股初畫兩偶是鼎之足也乾為金為圜中畫三奇是鼎之腹也坎為耳五下本坎是鼎之耳也上畫橫亘耳上則鼎之鉉也故謂之鼎鼎之用不過以巽木入離火以烹以飪為養生之具已耳而究乎其極古聖王事天南郊離為南烹犢以

享上帝尚賓澤宮

互兌為澤
離為宮

大亨以養聖賢孰非此

鼎以昭其報功崇德之思乎是則鼎之為器重有如此者乃卦辭曰元吉亨何也此卦內體為巽既謙卑遜順以善下外體下為坎耳上為離目坎離合德而耳目更極其聰明彼書之所稱允恭克讓明目達聰者何以加焉且鼎與革相覆革二之柔上行以居于五得中而應二之剛其于古聖王之尊德樂道者又无以異卦有此德有此體所以有元善之德者得以

易位而亨也亨則吉不假言矣

象曰木上有火鼎君子以正位凝命

上離為火下巽為木以木入于火下而上升其火有烹飪之意所以為鼎夫鼎之為器形端而體重所以聚其所受之寶也君子觀象于以正其所居之位恭已南面亦如鼎之形端而體重以凝其所受之命焉

此君子之法鼎也

此傳本九三覆革以立言蓋革之六爻唯九四位不正故于九四曰

改命改命者改二四所互之命也此卦六爻唯九三位獨正故于大象曰凝命凝命者凝二四所倒之命

也蓋此卦之三
即革卦之四也

初六鼎顛趾利出否得妄以其子无咎

否悲
已切

卦例以初為足此文居巽股之下兩岐而立故象鼎
之趾趾本在下以承全鼎利于正不利于顛也以初
居位不正所應之四亦不正因不正而上應于四以
求正則不得不顛而向上焉

初五互大過大過
顛也故取象顛

夫趾

而向上似乎不利然居初未有實巽臭又有積

巽為
臭

因其顛而反以出其否

初上之四互震
為出又似否卦

其于致潔之

義取新之宜

巽為潔齊
又為取新

有甚相合者何不利之有試

更求其象初本巽也進而易四則為兌兌為少女是

所得者妾婦之賤耳

兌為少女為妾

乃三五互之成震反以

獲主器之長子

震為長子主器

與顛趾出否之義一也初四

相易何咎哉

象曰鼎顛趾未悖也利出否以從貴也

初陰本宜下猶鼎趾本在下若顛而向上似乎悖理

然牲未實鼎之時鼎中尚虛于理未為悖也

悖與背通初上

之四互之成艮艮為背然因此得正故云未背况利于出否去其故而納其

新瀉其惡而受其美又因以從其珍羞之貴焉二五相易

之四承五雖顛何傷哉此爻只重上二句下句因易故曰從貴位又有此象故及之觀傳文

只解上二句可知或者因從貴二字將下句入講反生葛藤

九二鼎有實我仇有疾不我能即吉仇音求

舊解以初九為仇初二相比以云仇匹尚可言也若謂初為有疾不我能即爻中實无其象竊謂九二陽剛居中上有六五之應即象辭所稱之元吉亨也在

人為道德可以上答乎君相在物為膏腴足以奉養
乎聖賢是鼎中之寶也但四與二為同類方以折足
之故而覆其餽是我仇有疾矣有疾而降于初似與
二相即矣然二以剛中而得應六五方敬而求之彼
折足者豈能近而即之乎夫不我能即未足吉也以
上應于五而不我能即則真吉也吉則亨可知矣
象曰鼎有寶慎所之也我仇有疾終无尤也

二為有寶之鼎可以享上帝可以養聖賢自然上應

六五慎其所往也

巽為進退有慎之象

唯能慎其所往故雖我

仇有疾一時似乎有相即之尤然二五正應終與仇

遠孰得而尤之哉

九三鼎耳革其行塞雉膏不食方雨虧悔終吉

塞悉則切

此文若依舊解其理未嘗不順然証之卦象耳何以

革行何以塞三何以為雉膏五何以為方雨皆无一

實據總由膠守一文未嘗統觀全卦耳蓋此卦初二

四五皆有應唯三與上无應而一卦之中又唯三得

正而不可動故此文全就各爻之變正而言不在本

爻也九三陽剛得正居鼎腹之中是鼎之實也使上

有正應則以鉉貫耳以耳行鼎三之實人得食之矣

奈上居以九與三不應而五之鼎耳又與二相易而

革變

耳革確

初四易位方為互震之行而二進居互艮

乎其前又似阻塞而不能進

行塞確

是以三處上下二

離之間互坎之位雖有離雉坎膏之美而初五互頤

三介其中為頤中有物而不能食

不食確

其悔為何如

者要皆由上无正應故至此然上卦之本體非坎乎
坎固為雨也三上之互卦非睽乎睽固云遇雨則吉
也茲之无應特上未變坎為雨耳然諸爻皆變上亦
將變而方雨矣各爻皆正惟上爻不正坎象未成故曰方雨言將雨也三唯守
正以待自有正應之合而其悔皆亡如坎月之盈而
向虧是始雖不吉而終必獲吉也

象曰鼎耳革失其義也

鼎既有實自宜舉之以就人之食今耳而變革是失

其鼎實之義也

此句只宜就三言如井渫不食之行
側也若指五說五為君道豈可言失

九四鼎折足覆公餗其形渥凶

折之舌切覆芳目切
餗送鹿切渥于角切

他卦九四下應初六多吉獨鼎不然蓋鼎宜正不宜

倒倒則其實傾矣初六鼎未有實故以應四為顛趾

九四鼎已充實故以應初為折足

四下初上則无足
又居兌為毀折故

曰折鼎之重任所賴者足也今鼎而折足則鼎之所

受為公之餗者盡覆矣其鼎之形體有不并為之沾

渥乎

形渥作鼎形沾汚解與上
文亦一串渥兌澤之象也

蓋由四之任太重而

初之受其任者不勝也卦有大過之象初即所謂其
本弱者乎大臣任用非人而至于敗乃公事者何以
異此此所以凶也

象曰覆公餗信如何也

公餗所以享上帝養聖賢九四居此固將以此自信
也今盡舉而覆之是使上帝无以享聖賢无以養矣
其于平日之自信者為何如也問之之辭

六五鼎黃耳金鉉利貞

鉉懸典切下同

此爻即彖傳所謂柔進而上行得中而應乎剛也以
全卦言六五中虛而上峙有鼎耳之象以其得中故
曰黃耳鼎中之實所賴以舉之者此也然无鉉以貫
之雖有黃耳亦不能以自行今下有九二之剛與六
五為正應以其乾金居中有金鉉之象金鉉指九二
正與彖傳相
合程朱之說甚是而諸家俱以屬上九是泥
于已定之象而不知辭也者各指所之也六五以
柔中能下而應之取以貫乎耳之中是黃耳而有金
鉉焉由是以鉉舉耳以耳行鼎享上帝而養聖賢俱

于是乎在所以然者以二五易位各得其正故也占者得此亦必利于貞則得賢以自輔而天下胥得鼎養之利矣

象曰鼎黃耳中以為實也

此實字即九二鼎有實之實六五居鼎耳之位非受實之地也然五无實而能以已之中應二之中使二之實得以有用者皆五之力也則二之實即五之實矣故曰鼎黃耳非无實以二之中為實也

陽實陰虛其象甚明

諸家皆以中指六五何故觀此
傳則金鉉之屬九二更无疑

上九鼎玉鉉大吉无不利

此爻諸家只就上九言理非不精但思上九雖有鉉
象以陽居陰失位不正安得為玉二已稱鉉上又稱
鉉一鼎焉有二鉉竊以鼎與井皆以養人為義井至
上而後成功故五之元吉于上始言之鼎亦至上而
後成功故五之吉利亦于上始言之又此卦與大有
只差一爻大有于上九言有之終曰吉无不利此卦

于上九亦言鼎之終曰大吉无不利觀二卦卦辭爻象俱相似可知 鼎至六五下應九二其耳已有金鉉鼎之體已備矣然卦自初二易位五爻皆正唯上九不正不正則水火之功未成烹飪之事亦猶未竟也上九居卦之終有必變之理變則易剛為柔六爻皆當所謂舉鼎以耳運耳以鉉者可不名之為金直可名之為玉矣蓋剛柔兼備者玉之德然也

九二木自互乾

而來乾木為金為玉故既曰金鉉又曰玉鉉實一鉉也以其進五純剛故曰金以其統領全鼎故曰玉

夫上為玉鉉則卦成既濟水火之功已成烹飪之事
已竟以之薦上帝而上帝享其馨香以之養聖賢而
聖賢感其隆禮鼎之為用至是乃極九二有元德固
獲其吉諸爻皆之正亦无不利也

象曰玉鉉在上剛柔節也

此爻與井相似井元吉應在五而必至上爻乃見故
傳以在上二字明之此爻大吉亦屬五而亦必于上
爻乃見故傳亦以在上二字示之言玉鉉應在五而

今反在上者蓋溫潤而澤縝密以栗剛柔兼備者玉之德也上九變剛為柔六爻各正剛柔有節與玉合德也夫六爻與玉合德則水火濟而養道成鼎之為用極矣

向來祇以上九剛居柔位為剛柔節又以
上九六五為剛柔節皆不合全卦之義

周易辨畫卷二十六